



SLUŽBENE NOVINE

KANTONA SARAJEVO

Godina XIX – Broj 11

Ponedjeljak, 24. marta 2014. godine
SARAJEVO

ISSN 1512-7052

KANTON SARAJEVO

Skupština Kantona Sarajevo

Na osnovu člana 18. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13), i čl. 10. i 42. Zakona o cestovnom prijevozu Federacije Bosne i Hercegovine ("Službene novine Federacije BiH", br. 28/06 i 2/10), Skupština Kantona Sarajevo, na sjednici održanoj dana 04.03.2014. godine, donijela je

ZAKON

O TAKSI PRIJEVOZU U KANTONU SARAJEVO

POGLAVLJE I - OPĆE ODREDBE

Član 1.

(Predmet)

Ovim Zakonom uređuju se:

- uslovi, organizacija i način obavljanja taksi prijevoza na području Kantona Sarajevo (u daljem tekstu: Kanton);
- broj i razmještaj taksi stajališta, način njihovog korištenja, uređenja i održavanja, te broj vozila na pojedinim stajalištima;
- način utvrđivanja i naplate taksi prijevoza;
- način izdavanja uvjerenja o ispunjavanju uslova za obavljanje taksi prijevoza u postupku registracije taksi vozila;
- način izdavanja dopunske taksi oznake za vozilo, veličina, broj i izgled;
- osnovni i dopunski uslovi koje mora ispunjavati taksi vozač i taksi vozilo;
- prava i dužnosti vozača koji obavlja taksi prijevoz i lica koja se prevoze taksi vozilom;
- nadzor i
- kaznene odredbe.

Član 2.

(Značenje pojmova)

Pojedini izrazi upotrijebljeni u ovom Zakonu imaju isto značenje kao u Zakonu o cestovnom prijevozu Federacije Bosne i

Hercegovine (u daljem tekstu: Federalni zakon), osim pojmova koji imaju sljedeća značenja:

- "**broj stanovnika**" je zvanični podatak o procjeni broja stanovnika Federalnog zavoda za statistiku i služi za određivanje broja taksi vozila u Kantonu;
- "**cijena početka vožnje**" je dio cijene usluge taksi prijevoza koju utvrdi taksi prijevoznik, koja se prikazuje na taksimetru u trenutku njegovog uključivanja;
- "**cijena po kilometru**" je dio cijene usluge taksi prijevoza koja se utvrđuje za svaki pređeni kilometar;
- "**cijena sata čekanja**" je dio cijene usluge taksi prijevoza koja se utvrđuje za svaki sat ugovorenog čekanja vozila;
- "**dopunska taksi oznaka**" je akt koji za svako pojedino vozilo izdaje Ministarstvo saobraćaja Kantona Sarajevo (u daljem tekstu: Ministarstvo), a na osnovu kojeg se obavlja taksi prijevoz na području i s područja Kantona;
- "**ekološki opravdano taksi vozilo**" je taksi vozilo, koje za pogon koristi električnu energiju;
- "**samostalni taksi prijevoznik - fizičko lice**" je fizičko lice koje ispunjava uslove Federalnog zakona, Zakona o obrtu i ovog Zakona za obavljanje taksi djelatnosti, koji obavlja djelatnost, sam bez upošljavanja drugih lica, samostalno sopstvenim vozilom;
- "**taksi prijevoz**" je javni prijevoz lica u vanlinijskom cestovnom prometu za koji je cijena prijevoza za pređeni put unaprijed određena i utvrđuje se taksimetrom po cjenovniku usluga;
- "**taksi prijevoznik**" je pravno ili fizičko lice koje posjeduje licencu i druge dokumente potrebne za obavljanje taksi prijevoza izdate na osnovu Federalnog zakona i ovog Zakona;
- "**taksi prijevoznik - pravno lice**" je privredno društvo koje ispunjava uslove za obavljanje taksi djelatnosti prema odredbama Federalnog zakona i ovog Zakona;
- "**taksi stajalište**" je posebno uređena i označena javna saobraćajna površina na kojoj taksi vozilo pristaje, čeka i prima putnike;
- "**Udruženje taxi vozača**" je udruženje registrovano u skladu sa Zakonom o udruženjima i fondacijama a kome su

samostalni taxi prijevoznici i taxi prijevoznici-fizička lica, povjerali izvršavanje svojih obaveza. Udruženju taxi vozača na osnovu člana 6. gore navedenog Zakona, Ministarstvo saobraćaja može povjeriti da u okviru registrovane djelatnosti vrši javne ovlasti;

- m) "**taksi stajališno mjesto**" je dio taksi stajališta, obilježeno i predviđeno za smještaj jednog taksi vozila;
- n) "**taksi vozač**" je lice koje upravlja motornim vozilom kojim se vrši taksi prijevoz i koje ispunjava uslove iz člana 41. Federalnog zakona i uslove propisane ovim Zakonom;
- o) "**taksi vozilo**" je putničko vozilo kojim se obavlja taksi prijevoz i koje ispunjava uslove iz Federalnog zakona i uslova iz ovog Zakona;
- p) "**uvjerenje o ispunjavanju uslova za obavljanje taksi prijevoza**" je upravni akt koji Ministarstvo izdaje taksi prijevozniku u postupku registracije taksi vozila i u postupku verifikacije taksimetra;
- q) "**taksi djelatnost**" je djelatnost razreda 49.32 prema Od-luci o klasifikaciji djelatnosti Bosne i Hercegovine 2010 ("Službeni glasnik Bosne i Hercegovine" broj 47/10).

Član 3.

(Nadležnosti Ministarstva)

- (1) Ministarstvo je u smislu ovog Zakona, nadležno za:
 - a) utvrđivanje broja dopunskih taksi oznaka na području Kantona;
 - b) provođenje postupka dodjele slobodnih taksi oznaka taksijevoznicima;
 - c) izdavanje uvjerenja o ispunjavanju uslova za obavljanje taksi prijevoza u postupku registracije taksi vozila;
 - d) izdavanje dopunske taksi oznake u skladu sa kriterijima utvrđenim ovim Zakonom;
 - e) utvrđivanje lokacija taksi stajališta na području Kantona Sarajevo i broja stajališnih mjesta po svakom taksi stajalištu;
 - f) izdavanje uvjerenja za ugradnju taksimetra u vozilo koje ispunjava uslove u skladu sa ovim Zakonom.
- (2) Ministarstvo vodi evidenciju o:
 - a) licencama "D" prijevoznika;
 - b) licencama "D" taksi vozila;
 - c) iskaznicama taksi vozača;
 - d) rješenjima o ispunjavanju tehničko-eksploatacionih uslova za taksi vozila;
 - e) rješenjima o dopunskim taksi oznakama;
 - f) dopunskim taksi oznakama.

POGLAVLJE II - USLOVI, ORGANIZACIJA I NAČIN
OBAVLJANJA TAKSI PRIJEVOZA NA PODRUČJU
KANTONA SARAJEVO

Odjeljak A - Opći i posebni uslovi za obavljanje taksi prijevoza

Član 4.

(Opći uslovi za obavljanje taksi prijevoza)

- (1) Taksi prijevoz na području Kantona mogu obavljati taksi prijevoznici koji imaju sjedište, odnosno prebivalište na području Kantona, a u skladu sa ovim Zakonom i Federalnim zakonom.

(2) Taksi prijevoz na području Kantona može se obavljati samo kao osnovna djelatnost, odnosno kao obrt u osnovnom zanimanju.

- (3) Taksi prijevoz na području Kantona, može obavljati licencirani:
 - a) taksi prijevoznik - pravno lice,
 - b) samostalni taksi prijevoznik - fizičko lice - koji obavlja djelatnost, sam bez upošljavanja drugih lica,

Član 5.

(Posebni uslovi za obavljanje taksi prijevoza)

- (1) Za obavljanje taksi prijevoza taksi prijevoznik iz člana 4. stav (3) ovog Zakona pored uslova propisanih Federalnim zakonom mora ispunjavati i sljedeće uslove:
 - a) da posjeduje dopunsku taksi oznaku za vozilo,
 - b) da uredno izmiruje obaveze za korištenje taksi stajališta;
 - c) licenca "D" u formi rješenja koje je izdao nadležni organ Kantona, original ili ovjerena kopija;
 - d) obrazac licence "D" za vozilo koju je izdao nadležni organ Kantona;
 - e) rješenje o ispunjavanju tehničko-eksploatacionih uslova za predmetno taxi vozilo;
 - f) važeću naljepnicu pravnog subjekta ili udruženja kojem pripada za tekuću godinu;
 - g) važeću dokumentaciju o radio uređaju koji se nalazi u autu izdatu u skladu sa propisima Regulatorne agencije za komunikacije - RAK, te ugovor o korištenju radio veze i dozvolu za korištenje iste;
 - h) ugovor o radu na određeno ili neodređeno vrijeme za vozača uposlenog kod privrednog subjekta koji upravlja vozilom istog.
- (2) Taksi prijevoznik kome dopunsku taksi oznaku nije izdalo Ministarstvo, ne može obavljati taksi prijevoz na području Kantona.
- (3) Izuzetno od odredbi stava (2) ovoga člana, taksi prijevoznik kome Ministarstvo nije izdalo dopunsku taksi oznaku, na području Kantona može obaviti uslugu taksi prijevoza samo ako:
 - a) tranzitira teritoriju Kantona;
 - b) završava vožnju putnika započetu izvan Kantona.
- (4) U slučaju iz stava (3) tačka b) ovoga člana, taksi prijevoznik je dužan putniku prethodno izdati voznu kartu za prijevoz, koja obavezno sadrži sljedeće podatke: registarski broj vozila, relacija prijevoza, ugovorena cijena prijevoza, datum i vrijeme započinjanja prijevoza, te potpis i pečat prijevoznika.
- (5) U slučaju obavljanja prijevoza iz stava (3) ovog člana, na taksi vozilu ne smije biti postavljena krovna oznaka "TAXI".

Odjeljak B - Organizacija taksi prijevoza

Član 6.

(Organizacija taksi prijevoza)

- (1) Taksi prijevoz se organizuje jedinstveno za područje cijelog Kantona u vremenu od 00:00 do 24:00 sata svakim danom.
- (2) Taksi prijevoz obavljaju taksi prijevoznici korištenjem taksi stajališta.
- (3) Taksi prijevoz se obavlja organizuje i korištenjem radio veze te drugih telekomunikacijskih sistema.

Odjeljak C - Način obavljanja taksi prijevoza

Član 7.

(Prijem putnika)

- (1) Taksi vozač može primiti putnike na taksi stajalištu, na cesti ili na mjestu koje je pozivom radiovezom ili nekom drugom telekomunikacijskom vezom odredio putnik pod uslovom da je zaustavljanje taksi vozila dopušteno saobraćajnim propisima.
- (2) Taksi vozač na taksi stajalištu prima putnike po redu stajanja njegovog vozila na stajalištu.
- (3) Izuzetno, ukoliko putnik ima zahtjeve u pogledu cijene, komfora vozila ili po ličnom izboru, može zatražiti uslugu i od taksi vozača čije vozilo nije prvo po redu čekanja na stajalištu.
- (4) Kod prijevoza djece taksi vozač mora postupati u skladu sa odredbama Zakona o sigurnosti saobraćaja.

Član 8.

(Naknadni prijem putnika)

- (1) Putnik koji je započeo vožnju može odobriti taksi vozaču da uz njega primi i druge putnike. Kad se odjednom prevozi više putnika, usluga se naplaćuje samo jedanput.
- (2) Kad jedan od putnika napusti vozilo i plati prijevoz, nastavak vožnje smatra se novom vožnjom te se taksimetar ponovno uključuje.

Član 9.

(Zabrane)

- (1) Taksi vozilom se ne mogu prevoziti:
 - a) dijete do šest godina starosti, bez punoljetnog pratioca;
 - b) lica oboljela od zaraznih bolesti;
 - c) lica za koje postoji opravdana sumnja da bi moglo ugroziti sigurnost taksi vozača.
- (2) Taksi vozač može odbiti prijevoz u sljedećim slučajevima:
 - a) ako je lice pod utjecajem alkohola ili drugih opojnih sredstava;
 - b) ako je lice ili njegova prtljaga u tolikoj mjeri prljava da bi mogla oštetiti ili uprljati unutrašnjost vozila ili je prtljaga u toj mjeri obimna da ne može stati u prostor za prtljagu;
 - c) ako lice zahtijeva prijevoz i kućnog ljubimca;
 - d) ako se krajnje odredište prijevoza ne nalazi na području Kantona;
 - e) ako se prijevoz zahtijeva prema odredištu do kojeg zbog razloga više sile nije moguće doći.

Član 10.

(Završetak vožnje)

- (1) Taksi vozač dužan je naručeni taksi prijevoz dovršiti dolaskom na odredište, te putniku izdati račun za obavljeni prijevoz.
- (2) Taksi vozač dužan je po završetku prijevoza pregledati taksi vozilo, a nađene stvari prijaviti najbližoj policijskoj stanici.
- (3) Taksi vozač koji zbog kvara na taksi vozilu ili drugog opravdanog razloga ne može dovršiti prijevoz, dužan je putniku osigurati drugo taksi vozilo.

Član 11.

(Zaustavljanje i parkiranje taksi vozila)

- (1) Zaustavljanje taksi vozila radi ulaska ili izlaska putnika može se vršiti na:
 - a) taksi stajalištu;

b) mjestu na kojem saobraćajnim znakom nije zabranjeno zaustavljanje vozila.

- (2) Taksi vozač za vrijeme obavljanja djelatnosti ne smije parkirati taksi vozilo van taksi stajališta.
- (3) Taksi vozač ne smije zaustaviti ili parkirati taksi vozilo na dijelu kolovoza koji je kao stajalište za vozila javnog gradskog prijevoza obilježen saobraćajnim znakom i oznakama na kolovozu.

POGLAVLJE III - BROJ I RAZMJETAJ TAKSI STAJALIŠTA, NAČIN NJIHOVOG KORIŠTENJA, UREĐENJA I ODRŽAVANJA, TE BROJ VOZILA NA POJEDINIM STAJALIŠTIMA

Član 12.

(Taksi stajališta)

- (1) Taksi stajalište je posebno izgrađena i označena saobraćajna površina, na kojoj taksi vozila pristaju, čekaju i primaju putnike.
- (2) Taksi stajališta mogu koristiti taksi prijevoznici raspoređeni na isto od strane Udruženja ili privrednog subjekta u skladu sa postojećim planom i programom za tekuću godinu;
- (3) Na taksi stajalištu ne smije stajati više vozila nego što ima obilježenih mjesta za vozila.
- (4) Za vrijeme stajanja na taksi stajalištu, taksi vozač je dužan biti pored vozila ili u vozilu.
- (5) Taksi stajalište je obilježeno vertikalnom i horizontalnom saobraćajnom signalizacijom u skladu sa odredbama Pravilnika o saobraćajnim znakovima i signalizaciji na cestama, načinu obilježavanja radova i prepreka na cesti i znakovima koje učesnicima u saobraćaju daje ovlaštena osoba ("Službeni glasnik Bosne i Hercegovine" broj 16/07 i 61/07) - odjeljak C - znakovi obavjesti - Znak "taxi" III-54 i član 64 (vrste ostalih oznaka na kolovozu i predmeti uz ivicu kolovoza) znak VI-51.
- (6) Troškove izgradnje i održavanja taksi stajališta snosi Direkcija za puteve Kantona Sarajevo.

Član 13.

(Utvrđivanje lokacija taksi stajališta)

- (1) Lokacije taksi stajališta na području Kantona i broj stajališnih mjesta po svakom taksi stajalištu utvrđuje Ministarstvo, Planom o broju i razmještaju taksi stajališta.
- (2) Plan iz stava (1) ovog člana donosi se u skladu sa važećim prostorno-planskim dokumentima, u saradnji sa registrovanim udruženjima i privrednim subjektima koja imaju odobrenja za rad u skladu sa ovim Zakonom.
- (3) Izuzetno od odredbi stava (2) ovog člana, ukoliko prostorno-planski dokumenti nisu doneseni ili na njima nisu predviđene javne površine za taksi stajališta, Plan se donosi na osnovu stručnog mišljenja Zavoda za planiranje razvoja Kantona Sarajevo.
- (4) Pravnim subjektima i samostalnim taksi prijevoznicima - fizičkim licima učlanjenim u Udruženje, data su na korištenje već postojeća taksi stajališna mjesta, uz obavezu plaćanja mjesečne naknade, te svako momentom stupanja na snagu ovog Zakona zadržava svoja stečena prava, a u slučajevima promjene pravnog subjekta ili Udruženja, raspoređuje se na drugo taksi stajališno mjesto".

Član 14.

(Naknada za korištenje taksi stajališta)

- (1) Za korištenje taksi stajališta taksi prijevoznik, za svako taksi vozilo plaća naknadu kvartalno.
- (2) Visinu naknade iz stava (1) ovog člana utvrđuje Ministarstvo na prijedlog upravitelja ceste.
- (3) Naknade za korištenje taksi stajališta uplaćuje se na račun Direkcija za puteve Kantona Sarajevo.
- (4) Namjenu sredstava i raspodjelu između općina, Grada i Kantona, prikupljenih po osnovu prihoda iz stava (1) ovog člana, na prijedlog Ministarstva, posebnom odlukom utvrđuje Vlada Kantona.

POGLAVLJE IV - NAČIN UTVRĐIVANJA I NAPLATE
TAKSI PRIJEVOZA

Član 15.

(Cijena taksi prijevoza)

- (1) Cijenu taksi usluge utvrđuje taksi prijevoznik cjenovnikom.
- (2) Putnik plaća uslugu taksi prijevoza prema utvrđenom cjenovniku taksi usluga.
- (3) Cjenovnik taksi usluga mora biti ovjeren od Ministarstva i istaknut na vidnom mjestu u vozilu, a izvod iz ovjerenog cjenovnika u vidu naljepnice istaknut na desnom bočnom staklu zadnjih vrata.
- (4) Cjenovnik iz stava (1) ovog člana mora biti napisan na jednom od jezika konstitutivnih naroda u Bosni i Hercegovini i engleskom jeziku.
- (5) Cjenovnik iz stava (1) ovog člana obavezno sadrži:
 - a) cijenu početka vožnje;
 - b) cijenu vožnje po kilometru;
 - c) cijenu čekanja po satu;
 - d) cijenu prtljage po komadu;
 - e) uvećanje cijene za vožnju noću u periodu od 22,00 do 05,00 sati i vožnju nedjeljom i praznikom u periodu od 00,00 do 24,00 sati;
 - f) obavještenje za putnika da nije dužan platiti uslugu taksi prijevoza ukoliko mu taksi vozač ne izda račun u skladu sa odredbama ovog Zakona.

Član 16.

(Napлата taksi usluge)

- (1) Taksni vozač je dužan naplatiti cijenu prijevoza u iznosu koji pokaže taksimetar uvećanu za cijenu prtljaga, u skladu sa važećim cjenovnikom, osim u slučaju iz stava (5) ovog člana.
- (2) U slučaju da taksi vozač ne uključi taksimetar na početku vožnje, putnik nije u obavezi platiti cijenu usluge prijevoza.
- (3) Obračun cijene usluge taksi prijevoza obavlja se od trenutka kada putnik uđe u taksi vozilo, bez obzira na koji način je prijevoz naručen.
- (4) Taksni vozač je dužan po završetku vožnje putniku izdati račun za obavljenu uslugu prijevoza.
- (5) Za vožnju čije je krajnje odredište izvan područja Kantona, taksni vozač i putnik se mogu prije vožnje dogovoriti o fiksnoj visini naknade za taksi uslugu.
- (6) U slučaju prijevoza iz stava (5) ovog člana, taksni vozač je dužan prije otpočinjanja vožnje, putniku izdati račun za dogovorenu prijevoznu uslugu.

- (7) U slučaju iz člana 10. stav (3) ovog Zakona, taksni vozaču koji ne nastavlja vožnju pripada naknada za prijevoz iskazana na taksimetru umanjena za cijenu početka vožnje.

POGLAVLJE V - NAČIN IZDAVANJA UVJERENJA O
ISPUNJAVANJU USLOVA ZA OBAVLJANJE TAKSI
PRIJEVOZA U POSTUPKU REGISTRACIJE TAKSI
VOZILA

Član 17.

(Uvjerenje o ispunjavanju uslova za obavljanje taksi prijevoza)

- (1) Taksni prijevoznik koji po odredbama ovog Zakona ispunjava uslove za obavljanje taksi prijevoza, za vozila kojim obavlja taksi prijevoz dužan je pribaviti registarske tablice sa slovnim oznakom "TA", a u skladu sa Pravilnikom o registraciji vozila ("Službeni glasnik Bosne i Hercegovine", broj 69/09).
- (2) Ministarstvo na zahtjev taksi prijevoznika izdaje uvjerenje o ispunjavanju uslova za obavljanje taksi prijevoza u svrhu registracije vozila i u postupku verifikacije taksimetra (u daljem tekstu: uvjerenje).
- (3) Taksni prijevoznik koji posjeduje važeće rješenje o dodjeli "D" Licence prijevoznika, za vozilo za koje posjeduje važeću Licencu "D" vozila, važeću taksni oznaku, i ima izmirene obaveze za korištenje taksi stajališta što dokazuje potvrdom izdatom od strane udruženja kojem pripada ili odgovarajućim dokazom (virman) ako je u pitanju pravni subjekt, izdaje se uvjerenje da prijevoznik za traženo vozilo ispunjava uslove za obavljanje taksi prijevoza.
- (4) Ukoliko nije ispunjen jedan od uslova iz stava (3) ovog člana Ministarstvo izdaje uvjerenje u kome stoji da prijevoznik za traženo vozilo ne ispunjava uslove za obavljanje taksi prijevoza.
- (5) Uvjerenje se izdaje taksni prijevozniku u postupku zamjene vozila kada se utvrdi da su ispunjeni uslovi za zamjenu "D" Licence vozila kao i taksni prijevozniku kome je odobreno izdavanje taksni oznake.
- (6) Taksni prijevoznik, u postupcima navedenim u stavu (5) ovog člana, dužan je u roku od 15 dana Ministarstvu dostaviti ovjerenu kopiju potvrde o registraciji vozila.

POGLAVLJE VI - NAČIN IZDAVANJA DOPUNSKIH
TAKSI OZNAKA ZA VOZILA, VELIČINA, BROJ I IZGLED

Odjeljak A - Opće odredbe o dopunskoj taksni oznaci

Član 18.

(Opće odredbe)

- (1) Dopunska taksni oznaka je vlasništvo Ministarstva, a dodjeljuje se taksni prijevoznicima za taksi vozilo po principu jedna taksni oznaka za jedno vozilo.
- (2) Dopunska taksni oznaka ima jedinstveni evidencioni broj i izdaje se u jednom primjerku.
- (3) Izgled, dimenzije i sadržaj dopunske taksni oznake propisan je Pravilnikom o posebnim uslovima za motorna vozila kojima se obavlja prijevoz ("Službene novine Federacije Bosne i Hercegovine" broj 7/07 i 86/07).
- (4) Oznaka se postavlja u donjem desnom uglu prednjeg vjetrobranskog stakla.

Član 19.

(Izdavanje dopunske taksi oznake)

- (1) Dopunsku taksi oznaku izdaje Ministarstvo na način propisan ovim Zakonom, uz naknadu. O dodjeli taksi oznake, Ministarstvo donosi rješenje.
- (2) Rješenje o dodjeli dopunske taksi oznake i dopunska taksi oznaka se izdaje za svako pojedinačno taksi vozilo u slučaju:
 - a) produženja važnosti dopunske taksi oznake;
 - b) zamjene dopunske taksi oznake;
 - c) izdavanja slobodne dopunske taksi oznake u slučaju iz člana 30. stav (3) ovog Zakona.
- (3) Period važenja dopunske taksi oznake je godinu dana, ali ne duže od roka važenja licence "D" za vozilo.
- (4) Naknadu iz stava (1) ovog člana utvrđuje Ministarstvo.
- (5) Naknade iz stava (1) ovog člana su prihod budžeta Kantona.

Odjeljak B - Broj dopunskih taksi oznaka

Član 20.

(Utvrdjivanje broja taksi oznaka)

- (1) Broj taksi oznaka za Kanton utvrđuje Ministarstvo u omjeru 1 taksi oznaka na 700 stanovnika, dok se nove dopunske taksi oznake neće izdavati dok se ne postigne navedeni omjer.
- (2) Broj stanovnika u Kantonu, utvrđuje se jednom godišnje, a na osnovu izvještaja Federalnog zavoda za statistiku.
- (3) Broj slobodnih taksi oznaka posebnim aktom utvrđuje Skupština Kantona Sarajevo na osnovu razlike broja taksi oznaka iz stava (1) ovog člana i postojećeg broja važećih taksi oznaka, na kraju tekuće godine za narednu godinu po izvještaju resornog Ministarstva.
- (4) Na osnovu akta iz stava (3) ovog člana, Ministarstvo pokreće postupak dodjele slobodnih taksi oznaka.

Odjeljak C - Produženje važenja dopunske taksi oznake

Član 21.

(Zahtjev za produženje važenja dopunske taksi oznake)

- (1) Taksi prijevoznik koji posjeduje važeću dopunsku taksi oznaku, dužan je podnijeti zahtjev za produženje iste, prije isteka njenog važenja.
- (2) Zahtjev iz stava (1) ovog člana podnosi se najranije 15 dana prije isteka važenja dopunske taksi oznake.
- (3) Uz zahtjev taksi prijevoznik je dužan priložiti:
 - a) uvjerenje da nema dospjelih, a neizmirenih obaveza po osnovu javnih prihoda, ne starije od 90 dana, ili da izmiruje obaveze u skladu sa potpisanim sporazumom sa Poreznom upravom o načinu izmirenja obaveza po osnovu javnih prihoda;
 - b) dokaz o izmirenim obavezama za korištenje taksi stajališta;
 - c) dokaz o uplati naknade za produženje dopunske taksi oznake;
 - d) obavještenje o razvrstavanju obrta - srodne djelatnosti prema klasifikaciji djelatnosti odnosno obavještenje o razvrstavanju pravnog lica prema klasifikaciji djelatnosti;
 - e) rješenje o upisu poslovnog subjekta u sudski registar odnosno rješenje o odobrenju djelatnosti u skladu sa članom 4. stav (3) ovog Zakona;
 - f) potvrdu Porezne uprave o statusu za uposlenog vozača ili vozače.

- (4) Zahtjev za produženje roka važenja dopunske taksi oznake podnesen 60 dana nakon isteka važenja iste, Ministarstvo odbacuje kao neblagovremen, a taksi oznaka se smatra slobodnom.

- (5) Naknade iz stava (3) ovog člana su prihod budžeta Kantona.

Član 22.

(Rješavanje zahtjeva za produženje važenja dopunske taksi oznake)

- (1) Ministarstvo postupajući po zahtjevu iz člana 21. stav (1) ovog Zakona, po službenoj dužnosti provjerava da li taksi prijevoznik posjeduje:
 - a) važeće rješenje o ispunjavanju tehničko-eksploatacionih uslova za taksi vozilo;
 - b) važeću licencu "D" za taksi prijevoz u formi rješenja;
 - c) važeću licencu "D" za taksi vozilo i
 - d) važeću dopunsku taksi oznaku.
- (2) Ukoliko taksi prijevoznik ispunjava uslove propisane ovim Zakonom, Ministarstvo donosi rješenje o dodjeli dopunske taksi oznake i izdaje dopunsku taksi oznaku.

Odjeljak D - Zamjena dopunske taksi oznake

Član 23.

(Zahtjev za zamjenu dopunske taksi oznake)

- (1) U slučaju promjene podataka na osnovu kojih je izdata dopunska taksi oznaka, taksi prijevoznik dužan je u roku od 8 dana od dana promjene podataka podnijeti zahtjev Ministarstvu za zamjenu dopunske taksi oznake i dostaviti ovjerene kopije dokumenata kao dokaz o promjeni podataka.
- (2) Zamjensku taksi oznaku Ministarstvo izdaje sa prethodnim rokom važenja.

Odjeljak E - Unos prava na dopunsku taksi oznaku

Član 24.

(Unos prava na dopunsku taksi oznaku)

- (1) Dopunska taksi oznaka se ne može prenositi.
- (2) Ministarstvo daje saglasnost za unos prava na važeću dopunsku taksi oznaku prilikom: spajanja, pripajanja, podjele, promjene oblika društva koje je registrovano za obavljanje djelatnosti taksi prijevoza, a u skladu sa Zakonom o privrednim društvima.
- (3) Izuzetno od odredbi stava (1) ovog člana, za samostalnog taksi prevoznika - fizičko lice, Ministarstvo će Rješenjem odobriti prenos važeće dopunske taksi oznake u slučaju smrti ili prestanka bavljenja taksi djelatnošću ili objave djelatnosti taksi prevoznika - fizičkog lica u bilo kojem periodu na:
 - a) člana uže porodice koji ispunjava uslove za obavljanje taksi prevoza, odnosno za sticanje oznake, a pod istim se u smislu ovog Zakona podrazumijevaju: bračni drug, djeca rođena u braku i van braka, usvojena i pastorc, bračni drug djece, roditelji bračnih drugova, otac, majka, očuh, maćeha i usvojilac, braća, sestre i unučad,
 - b) drugo fizičko lice koje ispunjava uslove za obavljanje taksi prevoza po principu dvije za jednu, odnosno za sticanje prava na jednu oznaku, potrebno je izvršiti prenos dvije postojeće taksi oznake ugovorom zaključenim kod notara između lica koja prenose oznaku i lica koje preuzimaju oznaku. Ugovor je valjan kad Ministarstvo da saglasnost na isti.

- (4) Zahtjev za prenos dopunske taksi oznake, osobe navedene u stavu (3) ovog člana mogu podnijeti u roku od 90 dana od dana nastanka slučajeva navedenih u stavu (3).
- (5) Rok za rješavanje zaprimljenog zahtjeva sa potpunom dokumentacijom je 30 dana.

Član 25.

(Rješavanje zahtjeva prilikom unosa prava na dopunsku taksi oznaku)

U slučaju da podnosilac zahtjeva iz člana 24. stav (2) ovog Zakona ispunjava uslove za unos prava na dopunsku taksi oznaku, opće uslove iz člana 4. i posebne uslove iz člana 5. ovog Zakona, Ministarstvo donosi rješenje o dodjeli dopunske taksi oznake i taksi prijevozniku izdaje dopunsku taksi oznaku.

Odjeljak F - Način izdavanja dopunske taksi oznake

Član 26.

(Javni poziv za podnošenje zahtjeva za dodjelu dopunskih taksi oznaka)

- (1) Dopunske taksi oznake dodjeljuje Ministarstvo putem javnog poziva.
- (2) Na osnovu odredbi člana 20. stav (4) ovog Zakona, Ministarstvo raspisuje javni poziv za dodjelu dopunskih taksi oznaka koji se objavljuje u jednim dnevnim novinama u Federaciji Bosne i Hercegovine i na web stranici Ministarstva saobraćaja, Kantona Sarajevo.
- (3) Izbor taksi prijevoznika kome se dodjeljuje dopunska taksi oznaka, vrši se u skladu sa utvrđenim kriterijima izbora taksi prijevoznika.
- (4) Dokumenti predati u zahtjevu se ne vraćaju podnosiocu.
- (5) Zahtjev iz stava (1) ovog člana se ne može dopunjavati.

Član 27.

(Uslovi za podnošenje zahtjeva za dodjelu dopunskih taksi oznaka)

- (1) Podnosilac zahtjeva za dodjelu dopunske taksi oznake uz pisani zahtjev dužan je priložiti dokumentaciju kojom dokazuje:
- a) taksi prijevoznik - fizičko lice odnosno samostalni taksi prijevoznik:
- 1) da ima registrovanu djelatnost za obavljanje taksi prijevoza da posjeduje privremeno rješenje za obavljanje obrta "taksi djelatnost" u osnovnoj djelatnosti za fizička lica;
 - 2) da ima prebivalište na području Kantona;
 - 3) da posjeduje vozilo u vlasništvu ili kupljeno po osnovu ugovora o leasing-u;
 - 4) da ispunjava uslove iz člana 34. ovoga Zakona;
 - 5) potvrdu o ispunjavanju tehničko-eksploatacionih uslova za taksi vozilo izdatu od ovlaštene stanice tehničkog pregleda;
 - 6) da je izmirio obaveze javnih prihoda odnosno da nije evidentiran kao poreski obveznik.
- b) taksi prijevoznik - pravno lice:
- 1) da ima registrovanu djelatnost za obavljanje taksi prijevoza, kao osnovnu djelatnost;
 - 2) da ima sjedište na području Kantona;

- 3) da posjeduje najmanje jedno vozilo u vlasništvu, a ostala vozila mogu biti kupljena po osnovu ugovora o leasingu;
- 4) da za svako vozilo za koje podnosi zahtjev, ima uposlenog najmanje jednog vozača, koji ispunjava uslove iz člana 34. ovog Zakona;
- 5) za svako vozilo za koje podnosi zahtjev, potvrdu o ispunjavanju tehničko-eksploatacionih uslova za taksi vozilo izdatu od ovlaštene stanice tehničkog pregleda;
- 6) da je izmirio obaveze javnih prihoda odnosno da nije evidentiran kao poreski obveznik.

Član 28.

(Kriteriji izbora taksi prijevoznika)

- (1) Kriteriji za izbor taksi prijevoznika koji se prijavljuje na javni poziv iz člana 26. stav (1) ovog Zakona su:
- a) pogodnosti emisije izduvnih gasova (najmanje Euro 5 prema EURO karakteristikama motora);
 - b) starost vozila;
 - c) vrsta pogonskog goriva.
- Prednost kod istog broja bodova ima pravno lice ako zapošljava taksi vozača koji je:
- ili samostalni taxi prijevoznik koji je:
- (2) Prednost kod istog broja bodova ima pravno lice ako zapošljava taksi vozača koji je:
- ili samostalni taxi prijevoznik koji je:
- a) lice sa invaliditetom;
 - b) lice sa poznavanjem engleskog jezika.
- (3) Na osnovu javnog poziva, ne može biti izabran:
- a) taksi prijevoznik kojem je u proteklih godinu dana oduzeta dopunska taksi oznaka;
- (4) Način bodovanja prema kriterijima iz stava (1), (2) i (3) ovog člana utvrđuje Komisija iz člana 29. stav (1), a što se objavljuje u javnom pozivu.

Član 29.

(Izbor taksi prijevoznika)

- (1) Za provođenje postupka izbora taksi prijevoznika putem javnog poziva ministar saobraćaja Kantona Sarajevo (u daljem tekstu: ministar) imenuje Komisiju koju sačinjava 5 članova, od kojih su 1 iz reda uposlenih u resornom Ministarstvu, 2 iz reda poslanika Skupštine KS i po jedan predstavnik iz reda udruženja i privrednih subjekata.
- (2) Po okončanju roka iz javnog poziva za dostavu zahtjeva Komisija iz stava (1) ovog člana vrši bodovanje taksi prijevoznika koji ispunjavaju uslove iz javnog poziva i sačinjava preliminarnu rang listu.
- (3) Nepotpune i neblagovremene zahtjeve Ministarstvo odbacuje posebnim aktom na prijedlog Komisije iz stava (1) ovog člana.
- (4) Ministarstvo na svojoj web stranici i u jednim dnevnim novinama u Federaciji Bosne i Hercegovine objavljuje rang listu iz stava (2).
- (5) Na objavlvenu rang listu podnosioci zahtjeva mogu podnijeti prigovor Vladi Kantona u roku od osam dana od dana objavljivanja rang liste.
- (6) Vlada Kantona po prigovoru iz stava (5) ovog člana rješava u roku od 15 dana od dana njegovog podnošenja i nakon toga Ministarstvo utvrđuje i objavljuje konačnu rang listu.

- (7) Ministarstvo na osnovu konačne rang liste taksi prijevoznika i prema broju slobodnih dopunskih taksi oznaka iz člana 20. stav (3) ovog Zakona, donosi rješenje o dodjeli slobodnih dopunskih taksi oznaka.
- (8) Rješenje iz stava (6) ovog člana je konačno, a protiv njega se može pokrenuti upravni spor.

Odjeljak G - Izdavanje dopunske taksi oznake

Član 30.

(Rješavanje zahtjeva za izdavanje dopunske taksi oznake)

- (1) Na osnovu rješenja iz člana 29. stav (7) ovog Zakona, Ministarstvo, na zahtjev taksi prijevoznika, izdaje uvjerenje u cilju pribavljanja registarskih tablica sa slovnom oznakom "TA" i verifikacije taksimetra.
- (2) Po ispunjenju uslova iz člana 5. stav (1) ovog Zakona, taksi prijevoznik stiče pravo opremanja taksi vozila u skladu sa odredbama člana 37. ovog Zakona.
- (3) Po utvrđivanju ispunjavanja odredbi Federalnog i ovog Zakona u cilju obavljanja taksi djelatnosti, Ministarstvo donosi rješenje o dodjeli dopunske taksi oznake i taksi prijevozniku izdaje dopunsku taksi oznaku.
- (4) Rok za rješavanje zaprimljenog zahtjeva sa potpunom dokumentacijom, iz člana 27. ovog Zakona, je 30 dana.

Odjeljak H - Prestanak važenja dopunske taksi oznake

Član 31.

(Prijevremeni prestanak važenja dopunske taksi oznake)

- (1) Dopunska taksi oznaka prestaje važiti i prije isteka roka važnosti, ako taksi prijevoznik:
- nije izmirio obaveze o korištenju taksi stajališta, u periodu dužem od tri mjeseca;
 - prestane ispunjavati propisane uslove za dodjelu licence "D" prijevoznika;
 - prestane ispunjavati propisane uslove za dodjelu licence "D" za taksi vozilo.
- (2) Dopunska taksi oznaka prestaje važiti prestankom obavljanja taksi djelatnosti (član 33.).
- (3) Ministarstvo donosi rješenje o prestanku važenja dopunske taksi oznake iz stava (1) i (2) ovog člana.

Član 32.

(Postupci Ministarstva nakon isteka važenja dopunske taksi oznake)

- (1) Ministarstvo će po službenoj dužnosti pokrenuti postupak oduzimanja licence "D" za vozilo taksi prijevoznika kome je istekla dopunska taksi oznaka duže od 30 dana, a za koju nije podnesen zahtjev u skladu sa odredbama člana 21. stav (2) ovog Zakona.
- (2) Taksi prijevoznik je dužan u roku od 8 dana od dana pravosnažnosti rješenja iz člana 31. stav (3) ovog Zakona, vratiti Ministarstvu:
- dopunsku taksi oznaku;
 - licencu "D" za taksi vozilo i
 - iskaznicu taksi vozača.
- (3) Taksi prijevoznik je dužan u roku od 15 dana od dana pravosnažnosti rješenja iz člana 31. stav (3) ovog Zakona, dostaviti Ministarstvu dokaz da je nadležnom organu za registraciju vozila vratio registarske tablice sa slovnom oznakom "TA" za vozila kojim je obavljao taksi djelatnost.

Odjeljak C - Prestanak obavljanja taksi djelatnosti

Član 33.

(Utvrdjivanje prestanka obavljanja taksi djelatnosti)

- (1) Prestanak obavljanja taksi djelatnosti za samostalnog taksi prijevoznika - fizičko lice utvrđuje nadležni općinski organ u skladu sa Zakonom o obrtu ("Službene novine Federacije Bosne i Hercegovine", br. 35/09 i 42/11), odnosno za taksi prijevoznika pravno lice nadležni sud u skladu sa Zakonom o privrednim društvima ("Službene novine Federacije BiH", br. 23/99, 45/00, 2/02, 6/02, 19/03, 68/05, 91/07 i 84/08).
- (2) Prestanak obavljanja taksi djelatnosti može biti privremeno obustavljanje obavljanja obrta i trajno.
- (3) Privremeni prestanak obavljanja taksi djelatnosti zbog opravke ili zamjene taksi vozila ne može biti duži od šest mjeseci.
- (4) Nadležni organ iz stava (1) ovog člana o privremenoj obustavi, odnosno o ponovnom početku obavljanja obrta obavještava Ministarstvo.
- (5) Nadležni organ iz stava (1) ovog člana o trajnom prestanku obrta odnosno djelatnosti obavještava Ministarstvo.
- (6) Taksi prijevoznik je dužan u roku od osam dana od dana pravosnažnosti rješenja nadležnog organa iz stava (1) ovog člana o privremenom ili trajnom prestanku obavljanja taksi djelatnosti vratiti Ministarstvu:
- dopunsku taksi oznaku;
 - licencu "D" za taksi vozilo i
 - iskaznicu taksi vozača.
- (7) Taksi prijevoznik - pravno lice u slučaju odjave uposlenog taksi vozača dužan je u roku od osam dana prijaviti odjavu Ministarstvu i izvršiti povrat identifikacione kartice-iskaznice za vozača motornog vozila.

POGLAVLJE VII - OSNOVNI I DOPUNSKI USLOVI KOJE MORA ISPUNJAVATI TAKSI VOZAČ I TAKSI VOZILO

Odjeljak A - Uslovi za taksi vozača

Član 34.

(Posebni uslovi za taksi vozača)

Pored općih uslova propisanih Federalnim zakonom, taksi vozač mora ispunjavati i sljedeće posebne uslove:

- da mu pravosnažnom sudskom odlukom nije zabranjeno obavljanje djelatnosti taxi prijevoza, odnosno da mu pravosnažnom presudom o prekršaju nije izrečena mjera zabrane obavljanja djelatnosti, dok traju pravne posljedice odluke;
- da je zdravstveno sposoban što dokazuje ljekarskim uvjerenjem o zdravstvenoj sposobnosti za upravljanje motornim vozilom.

Član 35.

(Ponašanje taksi vozača za vrijeme dužnosti)

- (1) Za vrijeme obavljanja taksi prijevoza, taksi vozač mora biti uredno odjeven, kulturno se odnositi prema putnicima i u vozilu ne smije konzumirati cigarete.
- (2) Ponašanje taksi vozača, suprotno odredbama stava (1) ovog člana, može prijaviti putnik organu koji vrši nadzor nad provođenjem odredbi ovog Zakona uz predočenje dokaza o obavljenoj vožnji i ličnog dokumenta.

Odjeljak B - Uslovi za taksi vozilo

Član 36.

(Opći uslovi za taksi vozilo)

Pored uslova propisanih Federalnim zakonom, taksi vozilo mora posjedovati registarsku oznaku za taksi vozila propisanu Pravilnikom o registraciji vozila ("Službeni glasnik BiH", broj 69/09), na kojoj se nalazi slovna oznaka "TA".

Član 37.

(Posebni uslovi za taksi vozilo)

- (1) Pored uslova iz člana 36. ovog Zakona, taksi vozilo mora ispunjavati i sljedeće posebne uslove:
 - a) da na vidnom mjestu ima istaknutu važeću dopunsku taksi oznaku i to zalijepljenu na prednjem vjetrobranskom staklu u donjem desnom uglu, a da na zadnjem vjetrobranskom staklu posjeduje zalijepljenu naljepnicu udruženja ili privrednog subjekta kojem pripada;
 - b) da na krovu vozila ima istaknutu svijetleću taksi oznaku, koja mora svijetliti kada je vozilo slobodno za vožnju;
 - c) krovna taksi oznaka mora da sadrži naziv TAXI, te naziv privrednog subjekta ili udruženja kojem pripada;
 - d) da je opremljeno radio vezom;
 - e) ugovor o radu za vozača koji upravlja vozilom, a na osnovu člana 53. stav (3) Zakona o cestovnom prijevozu FBiH, kao i ovjerenu fotokopiju obrasca JS 3100 izdat od strane Porezne uprave Kantona Sarajevo;
 - f) vazeću naljepnicu pravnog subjekta kojem pripada za tekuću godinu;
 - g) važeću dokumentaciju o radio uređaju koji se nalazi u autu izdatu u skladu sa propisima Regulatorne agencije za komunikacije - RAK" (ugovor o korištenju radio veze i dozvolu saglasnost za korištenje iste),
 - h) da je opremljeno baždarenim taksimetrom u ovlaštenim stanicama od strane Instituta za mjeriteljstvo BiH;
- (2) Taksi vozila koja pripadaju jednom taksi prijevozniku - pravnom licu, moraju biti jednoobrazna u pogledu boje i oznaka na taksi vozilu.
- (3) Taksi vozilo se može koristiti za oglašavanje i isticanje propagandnih poruka, isključivo na bočnim stranama vozila.
- (4) U vozilu koje ne posjeduje važeće registarske tablice sa slovnom oznakom "TA" ne može se nalaziti taksimetar, sistem radio veze, krovna oznaka niti natpis koja sadrži riječ "TAXI" ili koja upućuje na obavljanje taksi djelatnosti.
- (5) Stakla na taksi vozilu smiju biti korištena za oglašavanje i postavljanje propagandnih poruka;

Član 38.

(Dodatna oprema i dokumentacija u taksi vozilu)

Pored opreme i dokumenata propisanih Zakonom o osnovama sigurnosti prometa na cestama u Bosni i Hercegovini, Federalnim zakonom i ovim Zakonom, u taksi vozilu se tokom obavljanja taksi djelatnosti mora nalaziti i:

- a) plan grada ili satelitska navigacija;
- b) cjenovnik usluga;
- c) polisa obaveznog osiguranja u okviru koje su svi putnici u vozilu osigurani od posljedica nesretnog slučaja;
- d) izvod iz ovjerenog cjenovnika u vidu naljepnice istaknut na desnom bočnom staklu zadnjih vrata;

- e) original ili ovjerenu kopiju certifikata o verifikaciji mjerila/taksimetra (ne starije od godinu dana).

POGLAVLJE VIII - PRAVA I DUŽNOSTI VOZAČA KOJI OBAVLJA TAKSI PRIJEVOZ I LICA KOJA SE PREVOZE TAKSI VOZILOM

Član 39.

(Obaveze taksi vozača)

- (1) Taksi vozač je dužan na početku vožnje uključiti taksimetar.
- (2) Taksi vozač je obavezan započeti vožnju po ulasku putnika u vozilo.
- (3) Taksi vozač je obavezan prihvatiti vožnju do zahtijevanog odredišta na području Kantona, bez obzira na dužinu i vrijeme trajanja vožnje, osim u slučaju iz člana 9. stav (1) ovog Zakona.
- (4) Taksi vozač je obavezan prijevoz obaviti najkraćim putem ili putem koji mu odredi putnik, ako je to dopušteno saobraćajnim propisima.
- (5) Za vrijeme obavljanja taksi prijevoza, taksi vozač mora imati vidno istaknutu iskaznicu taksi vozača.
- (6) Kada se taksi vozilo koristi za vlastite potrebe, taksi vozač je dužan ukloniti svijetleću taksi oznaku.

Član 40.

(Obaveze putnika)

- (1) Putnik je prilikom korištenja taksi usluga na području Kantona dužan koristiti taksi vozilo koje posjeduje registarske tablice sa slovnom oznakom "TA", svijetleću krovnu taksi oznaku i dopunsku taksi oznaku izdatu od strane Kantona Sarajevo.
- (2) Putnik koji je započeo i završio vožnju taksi vozilom na području Kantona dužan je po izlasku iz taksi vozila posjedovati račun.
- (3) U slučaju prijevoza iz člana 5. stav (3) ovog Zakona, putnik je dužan posjedovati kartu za prijevoz od strane taksi prijevoznika, koja obavezno sadrži podatke iz člana 5. stav (4) ovog Zakona.

POGLAVLJE IX - NADZOR I KONTROLA

Član 41.

(Nadzor i kontrola nad provođenjem Zakona)

- (1) Nadzor nad provođenjem odredbi ovog Zakona obavlja Ministarstvo.
- (2) Poslove inspekcijuskog nadzora nad provođenjem odredbi ovog Zakona obavljaju kantonalni saobraćajni inspektori.
- (3) Poslove kontrole taksi vozila i vozača u skladu sa odredbama ovog Zakona obavljaju i policijski službenici ovlašteni od strane Ministarstva unutrašnjih poslova Kantona Sarajevo (u daljem tekstu: policijski službenici).
- (4) Pravo inspekcijuskog nadzora nad provođenjem odredbi ovog zakona ima i federalna saobraćajna inspekcija u skladu sa Federalnim zakonom.
- (5) Poslove nadzora nad provođenjem odredbi koje se odnose na obezbjeđivanje javnog reda i mira na stajalištu, organizacije rada u smjenama, rasporedu vozača na stajalištima, izdavanje vožnji putem radio veze, vođenje reda o higijeni, staranju o postavljenim saobraćajnim znakovima pažnjom dobrog domaćina, obavljaju pravni subjekti ili Udruženje kojima su dodijeljena određena stajališta".

Član 42.

(Način obavljanja nadzora i kontrole)

- (1) Inspeksijski nadzor i kontrolu nad provođenjem odredbi ovog Zakona inspektor i policijski službenik obavlja na cesti ili na taksi stajalištu.
- (2) Inspektor može obavljati nadzor nad provođenjem odredbi ovog Zakona od strane taksi prijevoznika - pravnog lica u sjedištu i drugim poslovnim prostorijama tog prijevoznika.
- (3) Postupak nadzora nad provođenjem odredbi ovog zakona pokreće se po službenoj dužnosti ili na pisani zahtjev fizičkog ili pravnog lica.
- (4) Pravna i fizička lica mogu ponijeti zahtjev nadležnoj inspekciji da izvrši inspeksijski nadzor i odredi upravne i druge mjere iz njene nadležnosti.
- (5) Organ ovlašten za provođenje nadzora u skladu sa ovim Zakonom ovlašten je zaustaviti vozila koja su predmet ovog Zakona.
- (6) O poduzetim mjerama inspektor i policija jednom mjesečno obavještavaju Ministarstvo koje vodi evidenciju o istim.

Član 43.

(Ovlaštenja inspektora)

U vršenju inspeksijskog nadzora inspektor je ovlašten:

- a) pregledati:
 - 1) poslovne i druge prostorije;
 - 2) vozila, uređaje, opremu;
 - 3) dokumentaciju taksi prijevoznika i taksi vozača;
- b) narediti otklanjanje nedostataka koji se odnose na propisani izgled i opremu vozila;
- c) privremeno zabraniti:
 - 1) vršenje taksi prevoza, ako utvrdi da se vrši bez licence "D";
 - 2) korištenje taksi vozila ako ono ne ispunjava propisane uslove prema odredbama ovog Zakona;
 - 3) obavljanje poslova taksi vozača ako:
 - utvrdi da taksi vozač nema iskaznicu za vozača;
 - utvrdi da taksi vozač nije u radnom odnosu kod nadziranog pravnog subjekta;
 - onemogućiti izvršenje inspeksijskog pregleda ili odbije izvršiti naređenje inspektora;
 - 4) obavljanje taksi prijevoza ako utvrdi da taksi prijevoznik ne ispunjava uslove propisane odredbama ovog Zakona;
- d) isključiti vozilo iz prometa ako utvrdi da:
 - 1) obavlja taksi prijevoz vozilom koje nema važeće registarske tablice sa slovnom oznakom "TA", iz člana 36. ovog Zakona;
 - 2) ima važeće registarske tablice sa slovnom oznakom "TA" izdate od nadležnog organa izvan Kantona, a obavlja taksi prijevoz suprotno odredbama ovog Zakona;
 - 3) obavlja taksi prijevoz vozilom za koje ne posjeduje važeću dopunsku taksi oznaku, a vozilo je registrovano na području Kantona;
 - 4) se na vozilu nalazi oznaka koja sadrži riječ "TAXI" ili koja upućuje na obavljanje taksi djelatnosti, a

obavlja taksi prijevoz suprotno odredbama ovog Zakona;

- 5) se u vozilu koje ne posjeduje važeće registarske tablice sa slovnom oznakom "TA" nalazi taksimeter;
- 6) se u vozilu koje ne posjeduje važeće registarske tablice sa slovnom oznakom "TA" nalazi instaliran sistem radio veze;
- 7) nema validnog certifikata o verifikaciji mjerila/taksimetra.

Član 44.

(Ovlaštenja policijskog službenika)

- (1) Policijski službenik je dužan pokrenuti prekršajni postupak protiv pravnog ili fizičkog lica u slučaju kršenja odredbi ovog Zakona, osim u slučaju iz stava (2) ovog člana, gdje prekršajni postupak pokreće inspektor.
- (2) U vršenju kontrole, policijski službenik je ovlašten privremeno oduzeti registarske tablice i potvrdu o registraciji, uz izdavanje odgovarajuće potvrde, u slučaju iz člana 43. stav (1) tačka d) ovog Zakona.
- (3) Kod poduzimanja mjera iz stava (2) ovog člana, policijski službenik je dužan sačiniti službenu zabilješku te istu odmah dostaviti nadležnom inspeksijskom organu u Kantonu, a najkasnije u roku od 24 sata.
- (4) Uz službenu zabilješku iz stava (3) ovog člana, policijski službenik dostavlja i privremeno oduzete registarske tablice i potvrdu o registraciji.

Član 45.

(Postupak pri isključenju vozila iz saobraćaja)

- (1) Inspektor donosi rješenje o isključenju vozila iz prometa ako:
 - a) utvrdi da se vozilom čine radnje za koje je izrečena mjera privremene zabrane obavljanja taksi prijevoza iz člana 43. stav (1) tačka c) ovog Zakona;
 - b) utvrdi da se vozilom čine radnje predviđene odredbama člana 43. stav (1) tačka d) ovog Zakona.
- (2) Uz donošenje rješenja iz stava (1) ovog člana, inspektor oduzima registarske tablice i potvrdu o registraciji vozila, o čemu izdaje odgovarajuću potvrdu.
- (3) Inspektor je dužan u roku od tri dana od prijema službene zabilješke iz člana 44. stav (2) ovog Zakona, donijeti rješenje iz stava (1) ovog člana.
- (4) Mjera isključenja vozila iz stava (1) ovog člana u prvom slučaju izriče se do otklanjanja nedostataka koji su rješenjem utvrđeni i do izvršenja prekršajnog naloga koji je inspektor izdao za učinjeni prekršaj.
- (5) U ponovljenom slučaju, inspektor podnosi zahtjev za pokretanje prekršajnog postupka, a vozilo se, kao predmet kojim je počinjen prekršaj, privremeno oduzima i smješta na za to određen prostor do okončanja sudskog postupka, o čemu se izdaje potvrda o oduzimanju vozila.
- (6) U slučaju iz stava (1) ovog člana, inspektor zadržava registarske tablice vozila i potvrdu o registraciji za vrijeme trajanja upravne mjere, a nadležnom organu kod kojeg se vozilo vodi u evidenciji registrovanih vozila u roku od tri dana dostavlja potvrdu o oduzimanju istih sa naznakom do kojeg roka su oduzeti.
- (7) U slučaju iz stava (6) ovog člana, nadležni organ koji vodi vozilo u evidenciji registrovanih vozila, u jedinstvenoj bazi

vozila za dotično vozilo unosi napomenu da se u navedenom periodu ne mogu izdati druge registarske tablice.

- (8) Sve posljedice i troškove nastale zbog isključenja ili oduzimanja vozila iz prometa u cijelosti snosi nadzirano pravno ili fizičko lice.

Član 46.

(Postupak skidanja registarskih tablica sa vozila)

- (1) Obavezu skidanja registarskih tablica izvršit će vozač i iste predati ovlaštenom licu koje obavlja nadzor.
- (2) Ukoliko vozač odbije skinuti registarske tablice, vozilo se o trošku vlasnika ili vozača vozila upućuje na najbližu stanicu tehničkog pregleda ili najbližu automehaničarsku radionicu u kojoj će se obaviti skidanje registarskih tablica.
- (3) Ukoliko vozač onemogućiti ovlašteno lice koje obavlja nadzor u provođenju postupka iz stava (2) ovog člana, vozilo se specijalnim vozilom odvozi na prostor iz člana 45. stav (5) ovog Zakona, gdje se skidaju registarske tablice i vozilo čuva do okončanja prekršajnog postupka.

Član 47.

(Oduzimanje dokumentacije)

- (1) U vršenju inspeksijskog nadzora inspektor može oduzeti pravnom ili fizičkom licu dokumentaciju i isprave neophodne za obavljanje taksi djelatnosti, ako posumnja u njihovu ispravnost, odnosno ako poslovanje ne obavljaju u skladu sa tom dokumentacijom i ispravama.
- (2) Dokumentacija i isprave neophodne za obavljanje taksi djelatnosti se oduzimaju privremeno, odnosno na vrijeme potrebno za utvrđivanje njihove ispravnosti ili do donošenja konačnog rješenja pri čemu se nadziranom pravnom ili fizičkom licu izdaje potvrda.

Član 48.

(Rješenje o poduzimanju upravnih mjera)

- (1) O poduzimanju upravnih mjera kojim se naređuje otklanjanje utvrđenih nedostataka i nepravilnosti i poduzimanje drugih upravnih mjera i radnji, za koje je ovim Zakonom i propisima donešenim temeljem njega ovlašten, inspektor donosi rješenje.
- (2) Žalba izjavljena protiv rješenja donesenih na osnovu člana 43. stav (1) tačka c) i d) ovog Zakona, ne odlaže njihovo izvršenje.

Član 49.

(Obaveze stranke u postupku nadzora i kontrole)

- (1) Pravno ili fizičko lice dužno je omogućiti inspektoru ili policijskom službeniku obavljanje poslova nadzora i kontrole u skladu sa odredbama ovog Zakona.
- (2) Pravno ili fizičko lice, čije je poslovanje podvrgnuto nadzoru inspektora, dužno je na njegov zahtjev i u ostavljenom roku dostaviti tačne podatke i dokumentaciju potrebnu za obavljanje poslova iz njegove nadležnosti.

POGLAVLJE X - KAZNENE ODREDBE

Član 50.

- Novčanom kaznom u iznosu od 3.000,00 do 15.000,00 KM kaznit će se za prekršaj pravno lice ako:
- a) obavlja taksi prijevoz bez posjedovanja rješenja o dodjeli dopunske taksi oznake, iz člana 22. stav (2) ovog Zakona;
- b) obavlja taksi prijevoz bez posjedovanja dopunske taksi oznake, iz člana 5. stav (1) tačka a) ovog Zakona;

c) onemogućiti ili ometa inspektora u obavljanju poslova inspekcije iz člana 43. tačka c); člana 46. i 47. ovog Zakona;

d) obavlja taksi prijevoz bez cjenovnika iz člana 15. stav (3) ovog Zakona;

e) nema verificirano mjerilo / taksimetar (član 38. tačka e) ovog Zakona).

f) obavlja prijevoz suprotno članu 5. stav (3) i (5) ovog Zakona.

- Za prekršaj iz stava (1) ovog člana kaznit će se novčanom kaznom u iznosu od 500,00 KM do 2.000,00 KM i odgovorno lice pravnog lica.

- Za prekršaje iz stava (1) ovog člana pored novčane kazne izriče se i zaštitna mjera zabrane obavljanja djelatnosti za koju je izrečena kazna u trajanju od tri mjeseca do jedne godine.

- Za ponovljeni prekršaj iz stava (1) tač. a) b) c) i f) ovog člana izreči će se zaštitna mjera oduzimanja vozila kojim je prekršaj napravljen.

Član 51.

(1) Novčanom kaznom u iznosu od 2.000,00 do 10.000,00 KM kaznit će se za prekršaj pravno lice ako:

a) ne izvrši pravosnažno rješenje koje je na osnovu odredbe ovog Zakona donio inspektor, ili ne izvrši rješenje na koje žalba nema suspenzivno djelovanje;

b) u ostavljenom roku inspektoru ne dostavi tačne podatke i dokumentaciju potrebnu za rad (član 49. stav (2) ovog Zakona).

(2) Za prekršaj iz stava (1) ovog člana kaznit će se novčanom kaznom u iznosu od 200,00 do 1.000,00 KM i odgovorno lice pravnog lica.

(3) Za ponovljeni prekršaj iz stava (1) tačka a) i b) ovog člana izreči će se zaštitna mjera oduzimanja vozila kojim je prekršaj napravljen.

Član 52.

(1) Novčanom kaznom u iznosu od 1.000,00 do 5.000,00 KM kaznit će se za prekršaj taksi prijevoznik - pravno lice ako:

a) pri podnošenju zahtjeva za privremeni prestanak obavljanja djelatnosti taksi prijevoza ne vrati Ministarstvu rješenje o dodjeli dopunske taksi oznake, licencu "D" za taksi vozilo i iskaznicu za vozača (član 33. stav (6) ovoga Zakona);

b) odjavi uposlenog taksi vozača, a ne prijavi odjavu Ministarstvu i ne izvrši povrat identifikacione kartice-iskaznice za vozača motornog vozila (član 33. stav (7) ovog Zakona).

(2) Za prekršaj iz stava (1) ovog člana kaznit će se novčanom kaznom u iznosu od 200,00 do 1.000,00 KM i odgovorno lice pravnog lica.

Član 53.

(1) Novčanom kaznom u iznosu od 300,00 do 2.000,00 KM kaznit će se za prekršaj taksi prijevoznik - pravno lice:

a) ako povjeri upravljanje motornim vozilom vozaču koji ne ispunjava uslove iz člana 34. ovog Zakona;

b) čije vozilo kojim se obavlja taksi prijevoz ne ispunjava uslove iz člana 37. st. (1), (2), (3), (4) ovog Zakona;

(2) Za prekršaj iz stava (1) ovog člana kaznit će se novčanom kaznom u iznosu od 200,00 do 500,00 KM i odgovorno lice pravnog lica.

Član 54.

- (1) Novčanom kaznom u iznosu od 200,00 - 1.000,00 KM kaznit će se za prekršaj taksi prijevoznik - pravno lice ako:
 - a) povjeri obavljanje taksi prijevoza vozaču bez iskaznice iz člana 39. stav (5) ovog Zakona;
 - b) nema ovjeren cjenovnik iz člana 15. stav (3) ovog Zakona;
 - c) ako u roku od 15 dana od pravosnažnosti rješenja iz člana 31. stav (3) ovog Zakona, Ministarstvu ne dostavi dokaz o vraćanju registarskih tablica sa oznakom "TA" nadležnom organu za registraciju (član 32. stav (3) ovog Zakona);
 - d) pri podnošenju zahtjeva za trajni prestanak obavljanja djelatnosti taksi prijevoza ne vrati Ministarstvu dopunsku taksi oznaku, licencu "D" za taksi vozilo i iskaznicu vozača (član 32. stav (2) ovog Zakona);
 - e) pri podnošenju zahtjeva za trajni prestanak obavljanja djelatnosti taksi prijevoza Ministarstvu ne dostavi dokaz o vraćanju registarskih tablica sa oznakom "TA" nadležnom organu za registraciju (član 32. stav (3) ovog Zakona).
- (2) Za prekršaj iz stava (1) ovog člana kaznit će se novčanom kaznom u iznosu od 50,00 do 500,00 KM i odgovorno lice pravnog lica.
- (3) Za prekršaj iz stava (1) tačka a) ovog člana kaznit će se novčanom kaznom u iznosu od 1000,00 KM vozač ako upravlja vozilom, a nije u radnom odnosu kod vlasnika vozila. (član 43. tačka c) alineja 3) ovog Zakona).

Član 55.

- (1) Novčanom kaznom u iznosu od 500,00 - 1.500,00 KM kaznit će se za prekršaj samostalni taksi prijevoznik - fizičko lice, odnosno drugo lice ako:
 - a) obavlja taksi prijevoz bez posjedovanja rješenja o dodjeli dopunske taksi oznake, iz člana 22. stav (2) ovog Zakona;
 - b) obavlja taksi prijevoz bez posjedovanja taksi oznake, iz člana 5. stav (1) tačka a) ovog Zakona;
 - c) obavlja djelatnost taksi prijevoza u Kantonu bez dopunske taksi oznake izdate od strane Ministarstva (član 5. stav (2) ovog Zakona);
 - d) taksi vozilo ne ispunjava odredbe člana 37. ovog Zakona;
 - e) u roku od 15 dana od pravosnažnosti rješenja iz člana 31. stav (3) ovog Zakona, Ministarstvu ne dostavi dokaz o vraćanju registarskih tablica sa oznakom "TA" nadležnom organu za registraciju (član 32. stav (3) ovoga Zakona);
 - f) ometa ili sprječava slobodan pristup taksi stajalištu (član 6. ovog Zakona);
 - g) onemogućiti ili ometa inspektora u obavljanju poslova inspekcije iz člana 43. tačka c) i člana 46. i 47. ovog Zakona;
 - h) obavlja taksi prijevoz bez cjenovnika iz člana 15. stav (3) ovog Zakona;
 - i) nema verificirano mjerilo / taksimetar (član 38. tačka e) ovog Zakona.);
 - j) obavlja taksi prijevoz bez cjenovnika iz člana 15. stav (3) ovog Zakona;
 - k) obavlja prijevoz suprotno članu 5. stav (2), (3) i (5) ovog Zakona.
- (3) Za prekršaje iz stava (1) ovog člana pored novčane kazne izriče se i zaštitna mjera zabrane obavljanja djelatnosti za koju je izrečena kazna u trajanju od tri mjeseca do jedne godine.

- (4) Za prekršaj iz stava (1) ovog člana kaznit će se novčanom kaznom od 500,00 KM i vlasnik vozila.
- (5) Za ponovljeni prekršaj iz stava (1) tač. a) b) c) i k) ovog člana izreći će se zaštitna mjera oduzimanja vozila kojim je prekršaj napravljen.

Član 56.

- (1) Novčanom kaznom u iznosu od 200,00 - 1.000,00 KM kaznit će se za prekršaj samostalni taksi prijevoznik ako:
 - a) pri podnošenju zahtjeva za privremeni prestanak obavljanja djelatnosti taksi prijevoza ne vrati Ministarstvu dopunsku taksi oznaku, licencu "D" za taksi vozilo i iskaznicu taksi vozača (član 33. stav (6) ovoga Zakona);
 - b) pri podnošenju zahtjeva za trajni prestanak obavljanja djelatnosti taksi prijevoza ne vrati Ministarstvu dopunsku taksi oznaku, licencu "D" za taksi vozilo i iskaznicu taksi vozača (član 33. stav (6) ovoga Zakona);
 - c) pri podnošenju zahtjeva za trajni prestanak obavljanja djelatnosti taksi prijevoza Ministarstvu ne dostavi dokaz o vraćanju registarskih tablica sa oznakom "TA" nadležnom organu za registraciju (član 32. stav (3) ovog Zakona);
 - d) povjeri upravljanje motornim vozilom vozaču koji ne ispunjava uslove iz člana 34. ovog Zakona;
 - e) čije vozilo kojim se obavlja taksi prijevoz ne ispunjava uslove iz člana 37. stav (1), (2), (3) i (4) ovog Zakona;

Član 57.

- (1) Novčanom kaznom u iznosu od 100,00 KM kaznit će se za prekršaj taksi vozač vozila, ako:
 - a) ne nosi istaknutu identifikacijsku iskaznicu iz člana 39. stav (5) ovog Zakona;
 - b) ne započne vožnju po ulasku putnika u vozilo (član 39. stav (2) ovog Zakona);
 - c) ne prihvati vožnju do zahtijevanog odredišta na području Kantona (član 39. stav (3) ovog Zakona);
 - d) ne skine svjetleću taksi oznaku "TAXI" u slučaju prijevoza za vlastite potrebe (član 39. stav (6) ovog Zakona);
 - e) primi druge putnike u vozilo bez saglasnosti putnika koji je započeo vožnju (član 8. stav (1) ovog Zakona);
 - f) ne uključi taksimetar po ulasku putnika u taksi vozilo, (član 39. stav (1), osim u slučaju izdatog računa prema unaprijed dogovorenoj cijeni taksi usluge (član 16. stav (6) ovog Zakona);
 - g) ne izda kartu za prijevoz prije početka vožnje (član 16. stav (6) ovog Zakona);
 - h) omogući prijem ili izlazak putnika iz vozila van mjesta propisanih odredbama člana 11. stav (1) ovoga Zakona;
 - i) parkira ili zaustavi vozilo suprotno odredbama člana 11. stav (2) i (3) ovog Zakona;
 - j) ne izda putniku voznu kartu prije početka vožnje u slučaju prijevoza iz člana 5. stav (4) ovog Zakona;
 - k) ne skine krovnu znaku "TAXI" u slučaju prijevoza iz člana 5. stav (5) ovog Zakona;
 - l) obavlja poslove vozača, a da ne ispunjava uslove predviđene članom 34. ovog Zakona;
 - m) konzumira cigarete tokom vožnje ili se nekulturno odnosi prema putniku ili nije uredno odjeven (član 35. stav (1) ovog Zakona);
 - n) naplati cijenu prijevoza koja nije u skladu sa cjenovnikom iz člana 15. ovog Zakona;

- o) ne zaustavi taksi vozilo na znak ovlaštenih lica iz člana 42. stav (5) ovog Zakona.

Član 58.

- (1) Novčanom kaznom u iznosu od 50,00 KM kaznit će se za prekršaj taksi vozač, ako:
- ne izda putniku račun za uslugu prijevoza (član 16. stav (4), osim u slučaju prijevoza sa unaprijed dogovorenim cijenom taksi usluge (član 16. stav (5) ovog Zakona);
 - ne istakne cjenovnik usluga na vidnom mjestu u vozilu iz člana 15. stav (3) ovog Zakona;
 - zaustavi ili parkira taksi vozilo na dijelu kolovoza koji je kao stajalište za vozila javnog gradskog prijevoza obilježen saobraćajnim znakom i oznakama na kolovozu (član 11. stav (3) ovog Zakona);
 - se ne nalazi pored vozila ili u vozilu na taksi stajalištu (član 12. stav (4) ovog Zakona).
- (2) Novčanom kaznom u iznosu od 50,00 KM kaznit će se za prekršaj putnik, ako:
- koristi uslugu taksi prijevoza suprotno odredbama člana 40. stav (1) ovog Zakona;
 - ne posjeduje račun odnosno kartu u skladu sa odredbama člana 40. st. (2) i (3) ovog Zakona.

POGLAVLJE XI - PRIJELAZNE I ZAVRŠNE ODREDBE

Član 59.

(Prethodni postupci)

Svi slučajevi, odnosno postupci koji do dana stupanja na snagu ovog propisa nisu pravosnažno okončani završit će se po odredbama propisa koji je bio na snazi u vrijeme donošenja.

Član 60.

(Prethodni ugovori)

- Ugovori o dopunskoj taksi oznaci koji su sklopljeni između taksi prijevoznika i Ministarstva važe do isteka roka na koji su sklopljeni.
- Taksi prijevoznici koji na dan stupanja na snagu ovog Zakona imaju važeće ugovore o dopunskoj taksi oznaci izdaće se dopunska taksi oznaka odgovarajućom primjenom odredbi ovog Zakona koji se odnose na produženje dopunske taksi oznake.

Član 61.

(Podnošenje zahtjeva za produženje dopunske taksi oznake)

- Prijevoznici koji na dan stupanja na snagu ovog Zakona, nisu podnijeli zahtjev za produženje dopunske taksi oznake, imaju rok od 30 dana za podnošenje zahtjeva za produženje dopunske taksi oznake u skladu sa odredbama ovog Zakona.
- Prijevoznici koji na dan stupanja na snagu ovog Zakona imaju podnesene zahtjeve za produženje dopunske taksi oznake sa nekompletnom dokumentacijom imaju krajnji rok za upotpunu zahtjeva od 30 dana.
- Taksi prijevoznici koji ne produže dopunsku taksi oznaku u roku iz st. (1) i (2) ovog člana gube pravo na istu.
- Rok za opremanje taksi vozila u skladu sa članom 37. stav (1) tačka c) ovog Zakona je dvije godine od dana stupanja na snagu ovog Zakona.

Član 62.

(Nadležnost za rješavanje u drugom stepenu)

Protiv upravnog akta donesenog na osnovu ovog Zakona može se izjaviti žalba Vladi Kantona, u roku od 15 dana od dana njegovog dostavljanja, osim u slučaju iz člana 29. stav (8) ovog Zakona.

Član 63.

(Ravnopravnost spolova)

Odredbe ovog Zakona odnose se podjednako na lica muškog i ženskog spola, bez obzira na rod imenice upotrijebljene u tekstu ovog Zakona.

Član 64.

(Prestanak važenja propisa)

Danom stupanja na snagu ovog Zakona prestaje da važi Odluka o taksi prijevozu ("Službene novine Kantona Sarajevo", broj 10/04).

Član 65.

(Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-3766/14
04. marta 2014. godine
Sarajevo

Predsjedavajuća
Skupštine Kantona Sarajevo
Prof. dr. **Mirjana Malić**, s. r.

SADRŽAJ

KANTON SARAJEVO

Skupština Kantona Sarajevo

1. Zakon o taksi prijevozu u Kantonu Sarajevo

ALMIR BERIDAN



**ZAŠTITA I SPAŠAVANJE U
MEĐUNARODNOM I
NACIONALNOM PRAVU**



Sarajevo, 2014.

SAMIR SABLJICA

**ZAŠTITA POTROŠAČA
U BOSNI I HERCEGOVINI
U PROCESU PRIBLIŽAVANJA
EVROPSKOJ UNIJI**



Sarajevo, 2013.

NERMIN HALILAGIĆ

**POSEBNE
ISTRAŽNE
RADNJE
KAO ODGOVOR
NA ORGANIZOVANI
KRIMINALITET**



Sarajevo, 2013.



Službeni list BiH - Svakom zloupotrebom kupac se obavezuje da plati nastalu štetu - Sva prava zadržava JP NIO



**službena
glasila
2013.**

no. **17**

JP NIO Službeni list BiH
Dž. Bijedića 39, Sarajevo
Bosna i Hercegovina
tel/fax: ++387 33 722 041
722 054
722 043
e-mail: pretplata@sllist.ba
www.sluzbenilist.ba

"Službene novine Kantona Sarajevo" - Izdaje Kanton Sarajevo - Redakcija i administracija: JP Novinsko-izdavačka organizacija Službeni list BiH - Sarajevo, ulica Džemala Bijedića 39/III - Poštanski fah 3 - Direktor i odgovorni urednik: Dragan Prusina - Telefoni: Centrala: 722-030 - Direktor: 722-061 - Pretplata: 722-054, faks: 722-071 - Oglasni odjel: 722-049, 722-050, faks: 722-074 - Služba za pravne i opšte poslove: 722-051 - Računovodstvo: 722-044, 722-046 - Komercijala: 722-042 - Pretplata se utvrđuje polugodišnje, a uplata se vrši UNAPRIJED u korist računa: UNICREDIT BANK DD 338 320 22000052 11 - VAKUFСКА BANKA d.d. Sarajevo 160 200 00005746 51 - HYPO-ALPE-ADRIA-BANK A.D. Banja Luka filijala Brčko 552-000-0000017-12 - RAIFFEISEN BANK d.d. BiH Sarajevo 161-000-00071700-57 - Štampa: GIK "OKO" d. d. Sarajevo - Za štampariju: Mevludin Hamzić - Reklamacije za neprimljene brojeve primaju se 20 dana od izlaska lista.

Upis u sudski registar kod Kantonalnog suda u Sarajevu, broj UF/I 2168/97 od 10. 07. 1997. godine. - Identifikacijski broj 4200226120002. - Porezni broj 01071019. - PDV broj 200226120002. Pretplata za I polugodište 2014. za "Službene novine Kantona Sarajevo" iznosi 80,00 KM.

Web izdanje: <http://www.sluzbenilist.ba> - godišnja pretplata 200,00 KM po korisniku.